

**Liebe Iffwilerinnen und Iffwiler, / Liebi Guggisbergerinne und Guggisberger,**

**Liebi Festgmeind,**

***und hie darfi gloub ou sege : Liebi Familie-Mitglieder,***

---

Es ehrt mi sehr, dassi hüt zu öich es paar Wort darf cho brichte! Herzläche Dank fürd Ihladig. Ds isch mini auer ersti 1. Augustred.

I ha auso i de letschte Täg dörfe merke, dasses gar nid so eifach isch es schlaus Thema oder e gueti Idee ds finge, wo für sone Red chönnti passe.

U dasmi mi Vater scho sit 2 Mönet au 3 Täg nervös chunnt cho frage, wasi de wöugi säge, hets natürlech nid besser gmacht. Vilech hätti aber gschider ufne glost, wüu schlussendläch isch die Ahsprach, ebe glich wie befürchtet ersch dä Namittag fertig worde. Eso geits haut mängisch Hin und Her zwüsche dene Generatione.

Generatione, genau dem Thema wotti mi i de nächste paar Minüteli widme.

---

1942 – Denn het Europa ungerem 2. Weltchrieg glitte, dr Fium Bambi isch usecho und im chline, härzige Bärner-Bergdörfli Kandersteg isch dr Alt-Bundesrat Adolf Ogi gebore – ds si 56 Jahr bevors de ou bi mir sowit isch gsi. Zwüsche üs lige auso fasch zwo Generatione. Gad das Jahr het er si 80. Geburtstag dörfe fiire – dir heits vellech ide letschte Wuche ir Zytig gläse oder wie ig im Radio ghört.

Aber - Wiso chunnt iz di jungi Grossrätin a ihrere erste Festahsprach mit somene aute Päppu derhär?

Woni bi here ghocket fürnes paar schlau Wort ds scribe zum hie verzeue, bini afa eis mini aute Ungerlage vom Gymer ga füresueche, womer di Rethorik mau hei düregno. U da isch dr Ogi natürlech sofort fürecho – mir hei nämlech denn sini Red zum Jahrtausigwechsel analysiert - me hetere ou «di gerufene Rede» gseit. Dr eint oder anger vo öich masech sicher no erinnere, winer mit sire Tanne vorem Lötschberg isch gstange und d Festahsprach id Kamera het pääget. E chli e kuurlegi Gschicht isch das gsi und glich he er ebe gad ou inhaltlech es paar gueti Pünkt witergä denn zu Mau.

Wüus chli müehsam wär gsi, e Tanne ds zügge, hani denkt i mache iz das mau nümme ganz wi dr Ogi und nime lieber e chline Rebstock mit.

De Rebstock het drü verschideni Ranke und die Ranke möcht ig - wi dr Ogi mit de Tanneäscht - drüne verschidene Pünkt widme, wo für mi d Schwiz usmache – wüu die weimer ja hüt fiire, um die söus hüt ga!

Di ersti Ranke ghört öppisem wo üsi aktuell Zyt sehr prägt und ou ir Zuekunft immer no wi wichtiger wird werde. Es si di nöie Technologie und d Innovation. Gad momentan, womer zum Bispiu bir Energieversorgig mit grosse Schritte ine Versorgungslücke ineloufe – simer druf ahgwise, dass mer da derbi witerhin vorwärts mache und die nöie Technologie ou düe nütze. Für das bruchts i mine Ouge nid nöii Vorschrifte und Gsetz sondern motivierti Schwizerinne u Schwizer, wo vo dene Fortschritte wei und düe profitiere.

Die nächsti Ranke wetti ar Schwizer Tüchtigkeit widme. Mir blüetet ds Härz, weni i de Medie mues läse, dass üsi Generation – d Generation Z, wisi so schön sege - nümme gwillt isch ds schaffe. Hie wärs villedch Mau ar Zyt, dasmer chli zrugg luege und üs wider bewusst werde, wieso's üs hüt eigentlech so guett geit.

Und die letschti Ranke möchti ar Seubschtverantwortig und ar Lebensfröid widme. Was die mitenang zdüe hei frageternech? I finge es isch e Fröid weme für sich und sis Umfeld und sini Tate seuber verantwortlech isch und es isch i mine Ouge öppis vom schönschte dass mir hie ir Schwyz so viu chöi mitrede und ebe seuber ad Hang chöi nä. Mänigsch chöi mir «Bünzli-Schwizer» die Fröiid zwar nideso guett zeige, aber o a dem schaffemer no chli – am liebschte miteme schöne Festli wie dem dahie – oder?

Innovation, Tüchtigkeit, Seubschtverantwortig und Lebensfröid – das macht für mi d Schwyz us.

-----

Die drü Ranke gäbe zeme e Rebstock wo cha gedeihe und scho gli ersti Frücht wird trage. Und so hoffeni, dass ou üsi Schwyz mit dene drü Wärte cha gedeihe und Frücht cha trage und sech nid ds fest vo au dene üssere Ihflüss - wo momentan uf dr ganze Weut eso passiere - lat la verzerre.

Mängisch isches ebe guett weme a üsne Traditione ahchnüpft und uf die eutere Generatione lost, so wie ig hüt ha versuecht am Ogi sini Red no einisch la ufdlebe. Aber genauso wichtig wie die aute, schöne Traditione und Vorgehenswiiise ufrecht ds erhaute, isches ebe ou wichtig dasmer immer wider die nöie Müglicheite, Ideene und Visione ahlose u bruuche – dasme ar nöie Generation Platz schaffet und so zeme de Rebstock oder ebe die Werte duet pflege.

Ig gloube wemer nach dem Grundsatz witterschaffe, döfemer no ganz viu so gschänkti Tage erläbe, wies hüt eine isch oder wi dr Ogi würd sege, Freude Herrscht!

**Merci viu Mau für öies Zuelose und i wünsche öich no ganz e schöne Nationalfiirtag!**